

靜

志

居

詩

話

靜志居詩話卷十

秀水朱竹垞先生著

扶荔山房編輯

李夢陽字天賜更字獻吉慶陽人徙扶溝宏治癸

丑進士授戶部主事轉員外郎應詔陳言彈壽

寧侯張鶴齡繫錦衣獄旋釋之進郎中代尚書

韓文草奏劾劉瑾坐姦黨致仕

一云降山斷布政司經歷復逮

繫得釋

起江西提學副使恃氣陵鑠臺長訐奏罷

官寧庶人既誅坐為庶人撰陽春書院記獄辭

連及尚書林俊力持之得免卒後弟子私諡文

毅天啓初追諡景文有空同子集

成宏間詩道傍落雜而多端臺閣諸公白草黃茅紛蕪靡蔓其可披沙而揀金者李文正楊文襄也理學諸公擊壤打油筋斗樣子其可識曲而聽真者陳白沙也北地一呼豪傑四應信陽角之迫功特之律以高廷禮詩品淩川華泉東橋等爲之羽翼夢澤西原等爲之接武正變則有少谷太初傍流則有子畏霞蔚雲蒸忽焉丕變嗚呼盛哉獻吉五古源本陳王謝容初不以杜爲師所云杜體者乃其摹仿之作中多生吞語偶附集中非

得意詩也至效盧駱張王諸體特遊戲耳惟七古及近體專仿少陵七絕則學供奉蓋多師以爲師者其謂唐以後書不必讀唐以後事不必使此英雄欺人之言如江湖陸務觀司馬今年相宋朝秦相何緣怨岳飛等句非唐以後事乎

附錄俞右吉云獻吉五言古詩康樂以後一人七言近體少陵以後一人七言絕句太白以後一人惟五言近體少遜前賢頗有多才之恨然如江從樹裏斷山入雨中無隴樹迷關道吳山蔽驛樓揚鞭指河洛

立馬說周秦楚越窗中地江山戰後容風雲餘霸氣
吳楚混前朝塞口孤城斷峰腰細澗分林疎山盡出
風順櫓齊開幕雨津城樹春帆水國樓江山百戰後
登眺兩人初爽氣固殊倫也

何景明字仲默信陽人宏治壬戌進士授中書舍
人轉吏部員外出爲陝西提學副使有大復山

人集

宏正間作者倡復古學同調六七人李何實爲之長李
以秀朗推何何以偉麗目李其後互相抵牾何謂李搖

韓振鐸李誦何搏沙弄泥譬之鍼砭不中臉穴徒噍噍
耳兩君皆負才傲物何稍和易以是人多附之薛君采
詩云俊逸終憐何大復龐豪不解李空同自此詩出而
抑李申何者日漸多矣

又云初唐四子體今人棄之若土苴矣然其音節宛轉
從六朝樂府中來初學者正不可不知也默仲明月篇
擬議頗工未墮惡道子美詩云王楊盧駱當時體輕薄
爲文哂未休爾曹身與名俱滅不廢江湖萬里流其論
詩之旨若此然則初唐亦豈可盡廢乎

按仲默明月篇序云僕始讀杜子七言詩歌愛其陳
事切實布辭沉著鄙心竊效之以爲長篇聖於子美
矣旣而讀漢魏以來歌詩以唐初四子者之所爲而
反復之則知漢魏固承三百篇之後流風猶可徵焉
而四子者雖工富麗去古遠甚至其音節往往可歌
乃知子美辭固沉著而調失流轉雖成一家語實則
詩歌之變體也夫詩本性情之發者也其切而易見
者莫如夫婦之間是以三百篇首乎雝鳩六義首乎
風而漢魏作者義關君臣朋友辭必託諸夫婦以宣

鬱而達情焉其旨遠矣由是觀之子美之詩博涉世
故出於夫婦者常少致兼雅頌而風人之義或缺此
其調反在四子之下與暇日爲此篇意調若髣髴四
子而才質猥弱思致庸陋故摘詞蕪繁無復統飭姑
錄之以俟審聲者裁割焉 陳卧子云此序深得風
人之旨

又云仲默題畫諸篇源出杜陵匪徒貌似神亦似之

又云仲默懷五清先生詩云憔悴東都士吾師更可嗟
三年爲逐客萬里未還家暮阻巴山雪春行楚岸花江

湖無路覓流涕望天涯五清先生內江人南京禮部右侍郎卒贈尙書諡文肅劉公瑞也字曰德符山東按察僉事時教之子中宏治丙辰進士正德丁丑以按察副使提督浙江學政明年六月廣購經史子集發十一府儒學公貯備覽每冊隸書於序尾鈐以關防今各府俱散佚人間予每每見之惟湖州府學尙多存者予家所抄施宿張湜會稽二志乃其所儲本也又嘗於峴山建三賢祠以祀唐刺史顏公真卿宋知州事蘇公軾王公十朋則己卯年事也畱心風教若此可謂克盡其職儻

學使者悉如公所爲士風吏治何難不變予以爲三賢
祠在宜作栗主并祀公斯則賢有司之責矣公有五清
先生集十八卷又外臺集六卷訪之未獲故附識於此
附錄孫豹八云風雅互作雜體竝生仲默五平五仄
詩亦具體也詩云秋原何蕭蕭耳目去雜葺枯荷猶
穿塘苦瓠尙抱隴寒風吹空林落日照古冢徘徊觀
陳蹤露下髮疎此詩不見平仄之迹乃運思之神
更有七平七仄如吐舌萬里唾四海七變入白米出
甲離袿飛髻垂纖羅梨花梅花參差開是也

徐禎卿字昌穀一字昌國吳縣人宏治乙丑進士
除大理寺左寺副降國子監博士有迪功集又
有歎歎焦桐鸚鵡花間野興自慙等集

迪功少學六朝其所著五集類靡靡之音及見北地初
猶崛強賦詩云我雖甘爲李左車身未交鋒心未服顧
予多見不知量此項未肯下頗收旣而心傾意寫營壘
旌旗忽焉一變是時李何並陳未決雌雄迪功精銳無
多能以偏師取勝遂成鼎足其詩不專學太白而髣髴
近之七言勝於五言絕句尤勝諸體興慶池頭送君南

下等作雖龍標太白復生何多讓焉

又云人所應有盡有人所應無盡無大復是也人所應有盡有人所應無不必盡無空同是也人所應有不盡有人所應無盡無過功是也三雄真鼎足哉

又云樊少南與康德涵論詩而曰初唐詩如春園草木雜生未放之花含蓄渾厚生意勃勃盛唐則淘洗鉅冶條理可觀生意稍薄矣近日名家冠絕海內自許古人之上或失之峭者稜角峭厲而乏溫柔敦厚之旨或失之易者流麗光澤而少含蓄渾成之趣所以然者孜孜

於杜未嘗引而上之也陳約之爲高子業作序而曰子
美有振古之才故雜陳漢晉之辭而出入正變初唐襲
隋梁之後是以風神初振而縛靡未刊今無其才而習
其變則其聲拗厲而畔規不得其神而舉其辭則其聲
啾緩而無當彼我異觀豈不更相笑邪釋兩公之言若
與北地信陽均未愜意然則李何至嘉靖初聲燄漸歇
作者已有違言惟昌穀莫有訾之者麟洲稱李何有廢
興徐高必無絕響其知言之選乎

又云樂府宜以不求似似之通功白紵歌云三星爍爍

花滿堂素腕盈盈出洞房垂羅映縠耀明妝傲若雲中
開月光流情盼君君莫忘停歌節舞進玉觴願君安坐
夜未央次章云旨酒千壺列東廂美人如花嬌北堂高
歌合舞聖世昌願得歡娛永未央脂車秣馬且踟躕百
年之會忽須臾東流之水西飛鳥今我不樂何爲乎讀
之益見滄溟坼疆古人之非

迪功舟懷云天曠多樹林日赤溪路永我行一何勞窈
窕沂川嶺湍流好石鬪沙礫與舟鯁行行指前棲望望
不得遲火雲漸暖滅蟬鳴空山靜奄忽青松間了了挂

員景一與幽賞遇遂使煩慮屏先書謝廬僧爲埽香爐
頂迪功此等詩絕似青邱生

附錄王元美云徐昌穀如白雲自流山泉泠然殘雪
在地掩映新月又如飛天仙人偶游下界不染塵俗
又云昌穀如六翮搏風三危吸露快爽種種不可名
狀又云昌穀少卽摘詞文匠齊梁詩沿晚季迨見獻
吉始大悔改其樂府選體歌行絕句咀六朝之精音
采唐初之妙則天才高朗英英獨照律體微乖整栗
亦浩然太白之遺昌穀之於詩也黃鵠之於鳥瓊瑤

之於石松桂之於木也又云昌穀自選迪功集咸自
精美無復可憾其五集係少年時語舞陽絳灌貴後
向人稱其屠狗吹簫爲佳事寧不泚頰又云絕塵行
空吾推昌穀然不能諱其輕又云吳中如徐昌穀詩
祝希哲書沈啓南畫足稱三絕 胡元瑞云宏正間
詩流特衆然皆近逐李何士選升之近夫獻吉派也
華玉君采望之仲鵬仲默派也昌穀雖服膺獻吉然
絕自名家遂成鼎足獻吉議其大而未化蹊徑存焉
何元朗謂獻吉詩比之昌穀蹊徑尤甚王長公謂昌

穀所未至者大也非化也世以何王爲篤論

邊貢字廷實歷城人宏治丙辰進士授太常博士

擢戶科給事中遷太常寺丞出知衛輝府改荆

州陞湖廣

一云山西
一云河南

提學副使召拜南京太常

少卿累進戶部尚書有華泉集

華泉諸體不及三家獨五言絕句擅場昔宋吳江令張
達明與客論詩其言曰詩莫難於絕句尤莫難於五言
欲其章短而意長辭約而理盡華泉庶足當之大復贈
詩云陽春誠獨步清廟徒三歎以絕句論邊亦無媿於

三家也

又云杜牧之詩一夜不眠孤客耳主人窗外有芭蕉
居仁詩如何今夜雨只是滴芭蕉張安國詞點點不離
楊柳外聲聲只在芭蕉裏無名子詞窗外芭蕉窗裏人
分明葉上心頭滴古之愁夜雨者多以蕉葉爲辭高荷
大芋非所憎也元美謂廷實芭蕉不可言樹然維摩詰
經云是身如芭蕉樹而不堅固是芭蕉未始不可名樹
元美之言過矣

按廷實西園二絕云朝看長白山暮看長白山山色

有朝暮吾心常自閒庭際何所有有萱復有芋自聞
秋雨聲不種芭蕉樹王元美云芭蕉豈可言樹芋豈
庭中佳物且獨無雨聲乎俱屬未妥若作自憐秋雨
滴不復種芭蕉或作自聞秋雨聲不愛芭蕉色覺意
尤深婉

康海字德涵武功人宏治壬戌賜進士第一授翰
林修撰尋以救李夢陽坐逆瑾黨落職爲民有

對山集

德涵坐援獻吉遂挂清議歸田之後耽心詞曲其小令

云真箇是不精不細醜行藏怪不得沒頭沒腦受災殃
從今後花底朝朝醉人間事事忘剛方後落了膺和滂
荒唐周旋了藉與康論者原其心而悲之沒時家無長
物腰鼓多至三百副畱心風雅之日少宜其所就止此
爾

王九思字敬夫鄆縣人宏治丙辰進士選庶吉士
授檢討調吏部主事陞郎中坐劉瑾黨降壽州
同知尋勒致仕有漢陂集續集

康王並以樂府擅場而詩鮮合作王差勝康樂府亦爾

十四夜月與李獻吉飲云萬戶秋風礎杵哀殊鄉今夕
故人來竹間涼露蕭蕭下樓上浮煙細細迴地僻柴門
無過客家貧樽酒有餘醅疎簾碧簾須同醉明月青天
爲爾開

王廷相字子衡儀封人宏治壬戌進士選庶吉士
改兵科給事中以言事謫判亳州拜監察御史
巡按陝西爲鎮守廖巒誣奏下獄再謫贛榆縣
丞稍遷寧國同知歷四川按察使拜副都御史
巡撫四川入爲兵部侍郎都察院右都御史進

兵部尙書提督團營仍掌院事加太子太保卒

謚肅敏有家藏內臺二集

浚川敷歷之暇銳意詩文非徒扶大雅之輪抑且挾羣經之奧而又見善如不及其序空同子詩稱其掩蔽前賢命令當世秦漢以來寡見其儔然空同名成之後目空四海觀送昌穀之湖湘詩述一代人文之盛有云是時少年誰最文太常邊丞何舍人三子而外並不及浚川隻字也鄭繼之未嘗謀面乃有句云海內談詩王子衡春風坐遍魯諸生宜浚川見之有知己之感於繼之

身後賦少谷子歌焚其藁於燕望閩再拜歌云彼時才
傑游帝傍信陽之何棠陵方大梁翩翩李川甫吏部薛
生尤擅場於空同亦未齒及不無憾焉矣他日作遺興
十首其一云昔吟吳下徐昌穀幻出斯文百代先其二
云逸氣誰當鄭善夫其三云康子文章迥絕塵其五云
大復天才冠兩都其六云後來誰擅六朝奇君采分明
別綴詞其七云散逸長年何粹夫獨於空同則云疏越
朱絃大雅沉始知清廟有遺音峽江迫阨湍瀾出可是
空同太劇心殆有微辭焉信乎恩怨之難忘也浚川詩

格諸體稍狃惟五言絕句頗有摩詰風致下亦不失爲
裴十秀才崔五員外

附錄王元美云王子衡如外國人投唐武將坐禪威
儀解悟中不免露抗浪本色 黃清甫云浚川詩貴
達意不避險直多擬古樂府欲返真樸未見其工君
采出其門下所謂青出於藍也

朱應登字升之寶應人宏治己未進士除南京戶
部主事遷知延平府以副使提學陝西調雲南
尋陞布政司右參政有凌谿集

李何並與李目空諸子自三秦而外得其門者蓋寡心
慕手追凌谿一人而已其口占絕句云文章康李傳新
體驅逐唐儒駕馬遷蓋其文亦宗北地者祝希哲贈詩
云大韶張宮懸九變盡美善陳魯南詩云摘毫揚美詞
肆意逐高雲李獻吉詩云疏越發潛響爛若湍錦舒徐
昌穀詩云神飈清管發逸興白雲俱其為名流所賞如
此

附錄許伯誠云先生訓諸生云文者言之精也詩者
言之華也精則寓文於質故先體格而後組飾華則

緣情製詞故首興致而尙婉約漢魏詩雅而遠六朝
詩豔而縟辭隨世異情由衷發吾於唐取其溫厚焉
乃知見定於中言發諸外篇有所本辭有所裨信乎
必傳也已

顧璘字華玉先世吳縣人徙南京宏治丙辰進士
知廣平縣徵入爲南京吏部主事遷知開封府
降知全州起知台州府累遷至浙江左布政使
擢右副都御史巡撫江西乞終養忤旨勒致仕
再起巡撫湖廣顯陵工竣加工部尙書還朝改

南京刑部尙書有息園浮湘憑几山中歸田諸

集

華玉與劉元瑞徐昌穀號江東三才又與陳魯南王欽
佩稱金陵三俊當李獻吉何仲默詩名未盛時藉其宏
獎而王穉欽顏惟喬輩皆其所賞識闢息園於居室之
後鑿池壘石築載酒亭於西隅延接名士討論詩古文
辭張謫輒以箏琶佐觴有小樂工楊彬善曲每詫於客
曰此蔣南泠詩所云消得楊郎一曲歌者是也旣負海
內重望遇時貴人或傲然不爲意而山林寂寞之士虛

已下之祝希哲著觀雲賦唐子畏著廣志賦華玉恒對
客誦之及嚴惟中招飲既坐嫌其酒冷惟中令易熱酒
華玉又嫌太熱指顧揮霍目無主人嘗至浙訪孫太初
幅巾道衣放舟西湖上一夕見有舟泊斷橋下一僧一
鶴一童子煮茶華玉笑曰此必太初也移舟就之遂定
交焉入楚試童子得江陵張叔大奇之人謁脫所束屣
帶與之曰子他年所縮不止是畱此見老夫非虛譽爾
穉欽既失志日與狎客鬪雞走狗華玉欲見之穉欽不
肯往乃以計恐狎客乘其出游疾趨而前穉欽亟走匿

爲狎客夾持之強留之具賓主禮蓋其求友之勤如是
所撰國寶新編錄獻吉以下一十五人各系以贊其交
也廣而擇之也峻矣

附錄袁永之云宏治間獻吉昌穀仲默相與表裏以
鳴國家之盛華玉頡頏其間塤吹箎應莫敢軒輕他
如希哲之宏博伯虎之奇俊繼之之古淡升之之精
工太初之清曠履吉之麗逸元敬之冲泊伯時之醇
鬯欽佩之雋質叔鳴之新警咸號名家並稱國手
黃德甫云願詩發源清淺沿流徘徊忽有所觸一振

其響清映林樾頓洗俗聽如高林忽在下衣襟有雲
霧倒景猶照人平地黯將暮可謂春容雅韻又江橫
羣水合野濶萬峰開描寫江山超於凡想

按華玉度楓木嶺云初謂山拂天飛鳥不可度逡巡
躡危蹬乃卽我行路百折頻攀援十步九回顧高林
忽在下衣襟有雲霧倒景猶照人平地黯將暮東北
望故鄉江流莽傾注長風動萬里獨立難久竚

陳沂字魯南其先鄆縣人徙家南京正德丁丑進
士改庶吉士授編修進侍講出爲江西參議歷

山東參政轉行太僕寺卿有遂初齋拘虛館二

集

魯南詩亦勻整第乏警策蓋心懲北地勦襲之非而限於力也夏日雜興云野寺清涼舊有名空廊還傍石頭城侵階竹蔭差差轉入座荷香細細生西府山前車輦路南唐宮裏轆轤聲冰漿玉盃傳瓜處想像君臣萬古情

附錄顧元言云石亭與華玉欽佩並稱讀其詩恍乎臨蓬山而俯瞰閭苑深遠鬱然愚山云魯南論詩

專以唐人爲宗謂少陵七言聲洪氣正格高意美非
小家妝飾但才大不拘後學茫昧特拾其麤耳於時
大江南北文士稱朱顧陳王四家朱顧皆羽翼北地
共立壇壝而魯南能另出手眼訟言一時學杜之敝
欽佩亦與之同調江左風流至今未墜則二君蓋有
力焉

王韋字欽佩上元人宏治乙丑進士選庶吉士授
南吏部主事改兵部遷禮部郎中陞河南提學
副使終南太僕少卿有南原集

欽佩詩其源出於溫八又比之義山不合也其最著者
閣試春陰之作篇中起來小步傍闌階花霧襲衣寒氣
重李賓之批其卷云二語如有神助遂登上選相傳欽
佩爲秀才時夢中曾聞人誦之此與錢仲文湘靈鼓瑟
事相類儲靜夫又賞其朱樓十二畫沉沉畫棟泥融燕
初乳之句亡友王介人則謂苔花蒼潤上簾櫳濛濛經
雨還未雨二語尤貼切予意要不若空庭簾卷畫亦暝
隔牆惟見桃花明狀春陰更工也欽佩以疫終見顧東
橋集列朝詩稱其以母喪毀瘠卒蓋攷之未詳云

田汝霖字深甫祥符人宏治中舉人官兵部司務

有莘野集

左國璣字舜齊祥符人宏治中舉人有南郭集

田左並稱詩皆麤鄙信魯衛也

孫一元字太初不知何許人或曰安化王孫也自

號太白山人嘗西入華南人衡東登岳又南入

吳就昏於吳與施氏與劉麟吳琬陸崑龍霓稱

茗溪五隱有太白山人漫藁

太初家本秦人不愛空同圈束其詩亦不盡本唐音觀

其與杭東卿論詩作則知辨香所向乃屬涪翁故有勃興黃九窮妙處空自知之語劉元瑞墓表謂詩非唐以前則不顧未爲太初知己方山人太古讀其所寄詩云碧雲行空月皎皎春風滿地花斑斑庶幾近之

鄭善夫字繼之閩縣人宏治乙丑進士除戶部主事改禮部以諫南巡杖闕下尋乞歸用薦起南京刑部改吏部郎中有少谷山人集

繼之在宏正間不襲李何餘論別開生面好盤硬語往往氣過其辭雖源出杜陵實有類山谷者集中感時之

作可觀可怨頗不猶人其論詩五言云大哉杜少陵苦心良在斯末流但叫噪古意漫莫知鳳鳥空中鳴衆禽反見噬蓋有獨立不遷之槩焉當時孫鄭並稱孫非鄭敵朱鄭並稱朱亦非鄭匹也

景暘字伯時儀真人僑居南京正德戊辰賜進士第二仕至南京春坊中允掌國子司業事有前

溪集

前溪集久遂失傳從盧子明廣陵詩選錄得二首其與陳玉泉論詩云辭取達意若惟以摹擬爲工尺尺寸寸

按古人之跡務求肖似何以達吾意乎蓋亦矯北地之弊者

唐龍字虞佐蘭谿人正德戊辰進士累官太子太保吏部尙書卒贈少保諡文襄有漁石集

文襄敷歷中外宦轍所至必有畱題其詩長於五律句如鶯花邊地少風雨暮春多雲氣雨中白山光鳥外青斷湟春水淺亂石曉山稠赤峽青冥外飛泉急雨中星臨河影動風入鼓聲高野水流漁市山雲進郭門雪埋青兒叫霞引白鴛飛細雨孤帆落疎燈兩岸明巖林遺

魯殿呾畝變秦川野鹿避人走山禽向我啼凍雲投浦
宿倦鳥逐風迴百里郵程遠三更候吏稀殘碁榕葉暑
嫩醕菊花天巖置戍樓直峰懸鳥道斜客身病亦起短
髮落還梳竹外青藜杖風前細葛巾移松邀老圃失鶴
問前村均有風致

毛伯溫字汝厲吉水人正德戊辰進士除紹興府
推官徵拜河南道御史歷按福建河南湖廣陞
大理寺丞擢都察院右僉都御史巡撫寧夏山
西順天回理院事陞右副都御史工部尙書改

兵部從駕南征加太子太保天啓初追謚襄懋

有東塘集

東塘數與夏公謹李獻吉方思道相酬和故其詩頗具
風格夜泊富陽云秋夜江風急樓船水月明汀洲散漁
火烟樹隱山城雁逐星河沒蟲依草岸鳴鄉心愁欲絕
何處擣衣聲

韓邦靖字汝慶朝邑人邦奇之弟時號二韓正德

戊辰進士除工部員外乾清宮災應詔陳言繫

錦衣獄奪官爲民起山西左參議有五泉集

五泉心慕手追乃在大復比於西原南冷不足方之孟
有涯李嵩渚似勝一籌聞雁云鳴雁蕭蕭下寒燈故故
明角聲傳細雨雲色度高城兄弟無書信乾坤有甲兵
秋風歸未得見爾不勝情中秋同仲默望月云令節他
鄉酒闕山獨夜情看花秋露下望月海雲生碧漢通查
近朱樓隔水明南飛有烏鵲作意向人鳴

方鵬字時舉崑山人正德戊辰進士歷南京武選
郎擢山西提學副使以疾辭用薦徵拜春坊庶
子遷太常卿有矯亭集

矯亭古詩效陶近體學白頰饒自得之趣其自題小像
 云此像何人斯吳淞方矯亭頗記前身事生可六七齡
 一疾遽天死天地為晦冥蒼頭抱我哭諸婦慟拊膺其
 家乃城居面北高檐楹臨街列屠沽陰風助哀聲思之
 宛如昨語及輒涕零性靈想不昧還復得此生乃知記
 憶前身事匪獨鮑井羊環也

戴冠字仲鵬信陽人

一云吉水人

正德戊辰進士授戶

部主事以建言貶廣東烏石驛丞起戶部員外
 出知延平府改蘇州終山東提學副使有遠谷

集

仲鵠與仲默同鄉里詩亦同調謂之具體可爾或言其
五言律勝於仲默豈篤論乎立春日舟中云作客尙無
地他鄉空復春舟中兒女大天未歲時新樂事喧殊俗
窮愁縛遠人椒盤懷故里腸斷白頭親

陸震字汝亨蘭溪人正德戊辰進士以車駕員外
郎抗疏劾江彬逮繫三杖而死嘉靖初贈太常
寺少卿

太常力批龍鱗九死不悔裏尸之後晝晦如夜海子水

溢玉河七鐵柱齊折天變豈不足畏邪詩存無多錄四
十字一字一碧血也

按陸汝亨朝房待罪詩云驥尾思千里葵心託萬言
一身曾許國九死敢忘恩梅福冠猶在朱雲檻不存
空庭對明月古道照乾坤

胡纘宗字孝思一字世甫鞏昌人

一云山西
文水人

正德

戊辰進士特授翰林檢討外補嘉定州判移守
潼川遷南戶部郎中改吏部出知安慶府調蘇
州升山東參政改浙江歷河南布政使以右副

都御史巡撫山東改理河道乘輿幸楚纘宗作
詩記事爲戶部主事王聯所訐逮下獄尋放歸
有烏鼠山人集

孝思詩未入格顧沾沾自喜到處畱題當永陵南巡作
詩紀事有云穆王八駿空飛電湘竹英皇淚不磨用事
殊不倫乃刻之於石致騰讒者之口其得免死幸也謝
山人榛贈詩云白首全生逢聖主青山何意見騷人時
孝思年將八十矣杖劍呻吟猶占韻以謝其意氣有不
可及者然詩實牽率晉江王道思序之稱其宏深精毅

盛歸美於秦風毋亦嗜秦人之炙者與

又云康陵西幸悅樂戶劉良女遂載以歸貯之騰禧殿
號曰夫人及南巡日帝期以中途召之夫人脫簪于帝
以示信帝騎過盧溝亡之大索不得也行至臨清念夫
人召之以不見簪不往帝不得已兼程抵潞河載夫人
偕南寺觀幡幢列鎮國公號復繫以名夫人每得並書
嘉靖初納南京給事中王紀之言俾盡撤去然夫人在
途常諫帝游獵非專以色固寵者烏銀山人擬古詩云
驚喜君王至西華夜啓扉後車三十乘載得美人歸直

書其事亦取禍之萌也

丁奉字獻之常熟人正德戊辰進士除行人歷南
京吏部驗封司郎中有南湖畱棹

南湖詩不事鍛鍊與酣落筆往往暗合曩篇句如白蘋
風外水紅葉雨中山徑轉花間月山飛樹杪泉夜橋喧
客櫂曉碓起鄰燈菜甲今朝雨蒲香隔岸風人當紅樹
坐船觸白蘋行白髮生秋日黃花惜暮年山寒松子落
籬暝豆花深俱有風韻卽嘔心撚髭者爲之不過爾爾

曾璵字東玉瀘州人正德戊辰進士由戶部郎出

知建昌府有少岷存橐

王新建定寧庶人之亂吉安守伍公文定固稱首功同
時贛州則當塗邢珣袁州則武邑徐璉臨江則臨海戴
德孺饒州則晉江林城廣信則閩周朝佐撫州則鄞陳
槐建昌則少岷也其師至雖有後先實同力共濟少岷
有收復南康功而不見錄纂修地志者皆沒其實故表
出之詩雖未名家亦清脫無塵氣

田惟祐字裕夫蕭山人正德戊辰進士有滄螺集
裕夫領解浙闈時名蔚起一則知者寡矣詩如王謝子

弟雖未陶鑄毋論風流文采裙屐亦自不同晚登城樓
懷友云江城天暝夕陽微拍拍輕鷗逐浪飛水郭烟光
迷野屋海天風色上征衣倚樓長笛家何在出浦扁舟
人未歸愁絕知心成兩地目隨征雁思依依

楊慎字用修新都人正德辛未賜進士第一授翰

林修撰以議大禮泣諫杖謫永昌天啓初追諡

文憲有升菴集

虞伯生告袁伯長云文章之妙惟浙中庖者知之若川
人之爲庖也麤塊而大臠濃醢而厚醬非不果然饜也

而飲食之味微矣浙中之庖則不然凡水陸之產皆擇取柔甘調其滑齊澄之有方而潔之不已視之泠然水也而五味之和各得所求羽毛鱗甲之珍不易故性爲文之妙亦猶是耳讀用修詩無異川人之庖矣予爲之調擇澄潔去其濃醯厚醬蓋竊比於浙中之庖之義云南郊扈從省牲云天仗雲門外宵衣曉漏前蒼龍旂影動朱鷺鼓聲傳星爛甘泉燭霜清泰時烟南郊新警畢重觀孝皇年寄石季瞻赴臨安謫云聞道炎方謫遙從瘴海過後期淹歲月前路任風波霄漢蜚鴻遠關門虎

豹多卜居何處問薜荔在山阿春興云最高樓上俯晴
川萬里登臨絕塞邊碣石東浮三絳色秀峰西合點蒼
烟天涯游子懸雙淚海畔孤臣謫九年虛擬短衣隨李
廣漢家無事勒燕然懷歸云星橋南望沉犀渚雪嶺西
連抱珥河關塞渺茫魂夢隔山川迢遞別離多汀洲春
雨寒芳杜茅屋秋風帶女蘿心事未從詹尹卜生涯聊
聽菼童歌

附錄王元美云楊用修如暴富兒郎銅山金埒不曉
喫飯著衣又云用修工於證經而疎於解經詳於稗

史而忽於正史詳於時事而不得詩旨求之宇宙之外而失之耳目之前又云徐昌穀有六朝之才而無其學楊用修有六朝之學而非其才又云楊修撰之南中稟穠麗婉至華學士之巖居稟清澹簡遠俱遠勝玉堂之作 黃清甫云楊詩喜用僻事多著浮彩搜羅刻削無出其右而駢繪既繁性情多盡傳謂美能沒禮詩亦有之至誦其可憐風雨夜長在客塗中又江花與江草異國看春生情境俱窮真堪隕淚

王道字純甫武城人正德辛未進士改庶吉士歷

牛首寺一勺虎跑泉客醉黃花酒僧供白雪饀棘林花
落子茆屋燕將兒山遠不聞漏夜寒疑有霜頗類賈島

佛

南大吉字元善渭南人正德辛未進士授戶部主
事歷郎中出知紹興府有瑞泉集

元善好青紫囊書妙善占墓其守紹興謂窆石非禹葬
處別於廟東南建豐碑題曰大禹陵其後望秩於是處
焉五言詩頗穩帖無秦人忼厲之氣

頓銳涿州人正德辛未進士官戶部主事

一云有
長史

鷗汀漁嘯集

長史時名藉甚北人語云涿郡有才才一石銳得其八
詩頗警拔微嫌冗長耳

林大輅字以乘莆田人正德甲戌進士以工部員
外郎諫南巡予杖繫獄謫判夷陵州嘉靖初起
江西按察僉事歷副都御史巡撫湖南自劾歸
有愧瘖集

二山與南泠最相契詩亦近之第稍遜耳品當在李川
父子孟望之之間東蔣子雲都水云南泠三載賦閒居春

日長安近卜廬苑樹飛烟分客榻禁鐘浮月散朝車楊
雄天祿多奇字方朔金門有諫書相望西橋應不遠莫
教風雨往來疎

周在字善卿太倉州人正德甲戌進士除知寶坻
縣擢陝西道御史歷官浙江右參政有燕京逮
事錄行臺紀興

善卿獨攄胸臆不事規撫正如繁音迭奏忽聆于爲于
曲縱無妙理具足清機閨怨云江南二月試羅衣春盡
燕山雪尙飛應是子規啼不到故鄉雖好不思歸

李濂字川父祥符人正德甲戌進士授源陽知州

遷寧波府同知終山西按察僉事有嵩渚集

嵩渚集凡百卷最稱繁富然不甚剪裁其持論以明初
吳中四傑爲歸求其神似未免類桓宣武之擬劉太尉
也秋懷云瀟湘楓落鱖魚肥楚客懷歸未得歸頻憶鳳
城詢北使尙聞龍舸駐南畿驚心關塞旌旗動旅食江
湖諫疏稀本乏涓埃裨郡國擬將生事付漁磯

附錄愚山云川父作理情賦左舜齊持以示李獻吉
獻吉大驚訪之吹臺川父自此名滿河洛間久之讀

書深思始知獻吉持論之頗而學者沿襲之繆嘗有
絕句云唐人無選宋無詩後進輕狂肆貶詞真趣盎
然流肺腑底須模擬失神奇又云洪武詩人稱數子
高楊袁凱及張徐後來英俊崢嶸甚興趣溫平似弗
如當竄竊剽賊盛行之日獨具隻眼可謂卓爾不羣
者矣

蔣山卿字子雱儀真人正德甲戌進士授工部主
事諫南巡廷杖謫南京前府都事歷刑部郎中
出知河南府改濟州再改南寧升廣西參政有

南泠集

子雲詩如水精淨域盡掃游塵微嫌境太淺爾子三人
孝常孝若孝或皆能詩吳山遙入戶江水近通渠孝常
句也鴈度三更月烏棲獨樹霜孝若句也夕陽新雨後
明月落潮時孝或句也雖未出羣亦自濟濟

薛蕙字君采亳州人正德甲戌進士授刑部主事
改吏部歷員外郎中以議大禮下詔獄尋復職
未幾罷歸屢薦不出有西原集

薛公南巡諍吏大禮正人條達詞華淵源理學古詩自

河梁以暨六朝近體自神龍以迄五季靡不句追字琢
心慕手追歛北地之菁英具信陽之雅藻兼迪功之精
詣卓然名家又云君采年十二能詩王子衡謫判亳州
賞之曰可繼何李故其詩云束髮從師王浚川文章衣
鉢幸相傳爾時評我李何似白首摧頽只自憐其與用
修論詩云近日作者摹擬蹈襲致有拆洗少陵生吞子
美之謔求近性情無若古調直以沿流討源自許晚年
究心講學於詩不師擊壤尤人所難送楊石齋云社稷
功成後山林避寵年遭逢誰可竝出處獨超然反側當

前日經綸邁昔賢，殷憂興聖主。至治格皇天，凶豎同摧朽。蒼生盡解懸，廟謨隨指顧。臣節見周旋，智勇干夫敵。勳勞百辟先，賞仍虛裂土。名已重凌烟，握璽慚周勃。揮金笑魯連，急流嫌盛滿。介石慕貞堅，許國心恒切。還鄉與偶牽，畱侯初相漢。樂毅晚辭燕，異渥絲綸數。高風進退全，草停黃閣詔。花簇錦江船，水檻星橋側。茅堂雪嶺邊，雲霞深綠野。卉木富平泉，事業存鐘鼎。儀型照簡編，累朝瞻翊戴。四海憶陶甄，白首歸休記。青春送別筵，衣冠望行色。端不異登仙。

顧瓌字英玉上元人璘之弟正德甲戌進士除南
京工部主事改兵部歷郎中謫知許州遷溫州
府同知升山東按察僉事終河南按察副使有
寒松齋存橐

英玉爲東橋從弟東橋詩有落魄吾家蘇季子風流南
郡小馮君蓋謫牧許州時所寄也東橋闢息園以延賓
客載酒促膝諸亭朋簪滿座伎樂雜陳而英玉居隔一
牆臨街小樓曰寒松齋者坐卧其上訓童子以自給所
謂名教之外別有風猷者邪

劉天民字希尹歷城人正德甲戌進士除戶部主
事諫南巡受笞闕下改吏部諫大禮又受笞歷
文選郎中調知壽州累遷河南按察副使改四
川以計典罷有函山先生集

函山諫草兩陳再笞闕下其調知壽州也故事京官外
謫出都時以眼紗自蔽過部門選人擁其馬不得前函
山擲紗于地曰吾無媿於官俾汝輩見吾面目可耳蔡
鶴江送以詩云元祐黨人滄海外貞元朝士曉星前王
耕原送以詩云君不見盤中紫脂蟹疇昔橫行今安在

又不見坐上虎皮裯當日負嵎思殺人世間反獲那可
數鄙夫何事用心苦蓋以刺讒人也晚又以計吏罷憤
懣不平恒逃于詞曲有云把俺這沒嫂嫂的陳平也串
下一個招李中麓每稱之

林春澤字德敷侯官人正德甲戌進士授戶部主
事遷員外謫寧州同知歷吉安通判肇慶同知
召爲南京刑部郎中出知程番府有人瑞翁集
百年上壽世曰徒然然或有過之者吾錄滕安卿詩旣
援崑山周大賓新昌呂翁祖舉其本末矣侯官林太守

德敷百歲有司爲建人瑞坊榮之集中喜元孫生詩云
傳家二十有三世老我百年仍四春蓋卽於是年卒萬
歷癸未歲也德敷子應亮戶部右侍郎孫如楚工部右
侍郎

陳九川字惟濬別字竹亭又號明水臨川人正德
甲戌進士授太常博士坐諫南巡削籍世祖卽
位復官遷儀制司員外轉主客郎中下詔獄謫
戍鎮海衛尋放還有明水先生集

明水釋褐忽曰漆雕開謂吾斯之未能信吾可自信與

遂上疏請告歸謁陽明講學及官博士與舒修撰梓溪
夏貞外東洲萬主事五溪共諫南巡一時有四君子之
目既司主容爲羣小所憎重獲罪可謂信道之篤而九
死不悔者也詩非所長亦小有韻致題桃源圖云偶攜
鄉里入山川一隔塵寰幾百年世上祇言秦網密桃源
也有不租田

舒芬字國裳進賢人正德丁丑賜進士第一授翰

林修撰以諫南巡受杖謫福建鹽課司副提舉
嘉靖初議大禮再杖歸卒有梓溪集

舒公首犯逆鱗幾斃于杖其撰崇德李君墓志中書本末最詳謹抄撮于左始車駕議以三月十九日壬子東巡祀岱宗歷徐揚抵南京下蘇州復泝江浮漢登太和山人情洶洶懼變將相大臣多怨愍之十五日予率同館先上疏兵部黃鞏伯固陸震時亨疏亦上爲太宰陸完所沮是夕夏良勝于中萬潮汝信過予憤惋邀太常陳九川至署名明日吏部張衍慶元承刑部陸俸天爵等疏亦入又明日禮部姜龍應賓兵部孫鳳鳴和行人余廷瓚伯獻等俱連疏入時又有太醫院醫士徐鏊以

醫諫車駕不果出矣癸丑上忽震怒下黃鞏陸震夏良勝萬潮陳九川于錦衣衛獄以舒芬張衍慶姜龍孫鳳陸俸等百有七人跪午門外五日而行人司疏不報以通政司壅之也乙卯余廷瓚等俱下獄丙辰同黃鞏等六人亦跪午門外五日梏拳是日工部林大輅以乘等三人大理寺周子厚等十人亦連疏入丙辰俱下之獄亦梏拳跪五日時復有金吾衛指揮張英言車駕出必不利肉袒戟刃於胷以死諫天威遂不可霽戊午芬等一百有七人午門受杖四月己卯杖鞏等六人發徐鰲

邊遠充軍林大輅周敘余廷瓚俱受杖時死杖下者陸
汝亨劉宗夏何孟循林質夫劉珏余伯獻孟子乾劉平
甫李德卿詹敬之李崇德十有一人崇德諱紹賢盱眙
人以行人齋孝貞純皇后遺詔至徐州開讀時羣闕勢
熏炙率屬吏視州衛官偃然席班首君立詔左從容令
去其席搗不得與職官同禮焉其文比之實錄所紀尤
詳詩頗涉理學語五言如江花迎載酒沙鳥避歸航菊
黃三逕冷巖翠一松存七言如水入柁枻流去響風吹
魚網過來腥思家我亦愁千里爲客誰能耐十年紅粉

滿樓初入趙青山百里尙圍燕芳草有情生夜雨天桃
如夢繞春山未如莊子舟藏壑欲買謝公墩結廬高樹
閑雲輕護鶴小橋新水淺通魚芹香華屋來元鳥樹暗
青山隱杜鵑誰爲剪殘今夜韭獨憐開盡故園花皆蕩
然有致

夏言字公謹貴溪人正德丁丑進士授行人歷吏
科都給事中改翰林侍讀學士累官少師吏部
尙書兼華蓋殿大學士後棄市追諡文愍有桂

洲集

貴溪游覽贈酬之作不及分宜而應制詩篇投頌合雅
不若袁文榮之近於褻也無逸殿應制云睿藻承遺訓
農歌啓聖衷千秋所無逸七月詠豳風帝學詩書在神
謀制作同光昭文祖業原上有新宮夜泊吳江云月岍
秋燈滅風湖夕浪翻橋連楓葉冷城帶水雲昏把燭延
津吏傳舟次驛門漁歌起何處瀟灑數家村

蔡經字廷彝侯官人復姓張正德丁丑進士累官
南京兵部尙書總督浙直軍務改左都御史爲
趙文華所劾逮至京論死追諡襄愍有半洲

襄愍死非其罪郡志冤之國史白之而愚山氏以爲東
南之論殊不然傳聞異辭不可不覈以余所聞趙文華
病篤命禱其平生所陷六人襄愍其一則文華已心悔
其誣且與楊忠愍同日死於市公論亦可定矣其詩特
清婉無拔劍橫槩氣蘭河曉渡云月落金城鼓角殘危
關曉色拂雕鞍黃河渺渺中原隔紫塞迢迢邊地寒西
望旌旗連瀚海東來風雪滿臯蘭萍蹤萬里休惆悵虎
節龍沙亦壯觀

張岳字維喬惠安人正德丁丑進士除行人疏諫

南巡受杖調南國子學正入爲武選員外歷祠
祭郎中出爲廣西提學僉事調江西謫廣東鹽
課提舉遷知廉州府轉浙江提學副使歷參政
以僉都御史撫治鄖陽改江西尋以右副都御
史總督兩廣軍務召入爲刑部侍郎掌都察院
事復出總督楚蜀卒贈太子少保諡襄惠有小

山類橐

襄惠初釋褐與林希元陳琛談理學時目爲泉州三狂
始以言禮忤永嘉繼忤貴溪分宜幸以功名終文治武

功所至登績詩其餘技然如宛宛西飛日餘光照我裳
江空流月華白石光凌亂理深物有悟興極感相因幽
篁迷舊蹊回磴距飛轍微風萬里陰落日半江烟非熟
精文選理者不能作也

許宗魯字伯誠一字東侯咸寧人正德丁丑進士
改庶吉士授監察御史歷湖廣按察僉事副使
太僕少卿大理少卿以僉都御史撫保定以副
都御史撫遼東有少華陵下遼海歸田等集

少華諸體皆工寓和婉於悲壯之中譬之秦箏獨無西

氣足與邊廷實王子衡竝驅東岳云秩祀嚴東土明禋
冠五宗金函神鬼籙玉簡帝王封海湧中宵日巖畱上
古松何時凌截竄飛舉跨蒼龍清溪泛舟云清溪澹無
色客子放歸舟浦暗黃花雨江行白露秋故人惜遠別
尊酒話中流漸近銅陵縣青山動我愁

附錄愚山云東侯才氣宏放家本秦人承康王之流
風罷官家居日召故人置酒賦詩時時作金元詞曲
關中何棟西蜀楊石浸淫成俗熙朝樂事至今士大
夫猶豔稱之

戴鬣字時重鄞人正德丁丑進士除刑部主事歷
官右副都御史巡撫四川有東石遺藁

附錄李杲堂云中丞擅經世才負氣高亢居官四十
餘年關節不至其門權貴俱心憚之竟坐此三起三
黜不得盡其用論者惜焉其詩老健蒼涼是一作手
胡侍字承之咸寧人正德丁丑進士除刑部主事
進員外升鴻臚寺少卿坐議大禮謫潞州同知
尋下詔獄論爲民尋命復職有濛谿集

承之詩原北地而五言頗近信陽弁洲稱之云雖於風

雅未縣合往往時材骨格殊亦不失實送劉德徵守夔
府云國有蠶叢古城聞白帝雄龍蛇夏禹廟雲雨楚王
宮羽檄通南徼樓船進北風還令蜀父老喜得漢文翁

王漸逵字用儀番禺人正德丁丑進士授刑部主

事建言不報乞歸隆慶初追贈光祿少卿有青

蘿集

青蘿詩無定格遣興卽題鐵橋一絕云在客山中不費
招瑤池春宴夜聞簫醉餘不記歸時路曾跨青羊過鐵
橋直追蹤唐許碣閩苑花前之作

曹嘉字仲禮扶溝人正德丁丑進士改庶吉士授
御史以言事出補大名府推官尋復官御史又
以言事下獄謫禹城知縣降茂州判官仍復原
職升山西提學副使終江西右布政使有漫山

集

王元美撰卮言謂獻吉晚爲其甥曹嘉所厄良苦而鄉
黨之論不然朱秉器游宦餘談述汴人語謂仲禮終身
父事獻吉勿衰梓行舅氏集選吳下以善書名者繕寫
獻吉兄孟和有姊卽仲禮母素與獻吉有隙恒不相見

一日兄姊欲過獻吉獻吉喜劇盛供饌以俟比入門獻吉出迂方揖孟和卽踣獻吉于階兄姊交殿之時仲禮在都聞之惶懼不寧者旬日專人以書慰獻吉是厄其舅者非仲禮矣仲禮好賓客所與游最密者詩則謝茂秦書則徐子仁奕則闕子明嘗語茂秦云吾舅氏稱詩家鍊字不如鍊句鍊句不如鍊意鍊意不如鍊格蓋墨守舅說若是以此知卮言亦有不足深信者

靜志居詩話卷十